

Жаңа төсбелгі иеленді

Белгілі өлкетанушы, қолөнер шебері Шөптібай БАЙДІЛДИН Қ. И. Сәтпаев атындағы төсбелгі иеленді.

Шөптібай ағамызға бұл марапат Қаныш Сәтпаевтың туғанына - 120 жыл толуына орай Жезқазған қаласында ұйымдастырылған халықаралық конференция аясында табыс етілуі тиіс болған. - Халықаралық конференцияны Жезқазғандағы Қ. Сәтпаев атындағы геологиялық мұражай ұйымдастырды. Мен ол жиынға белгілі себептермен қатыса алмауыма байланысты, конференциядан кейін төсбелгіні аталған мұражай директоры, академик Кенжал БАЛКЕНОВ табыс етті,- дейді ағамыздың өзі.

Қашан да ізденіс үстінде жүретін Шөптібай БАЙДІЛДИН Қазақ хандығының тарихына байланысты, Жошы, Хақназар, Қасымхан, Абылайхан, Кенесары хан, Ә. Бөкейханов сынды тұлғалар мен Торғай өңірінің тарихы, мәдениеті, өнері жайлы Жезқазған қаласының «Сарыарқа», Сәтпаев қаласының «Шарайна» газеттеріне 60-тан астам мақалалар жариялаған. Ағамыздың осы және басқа да еңбектері ескеріліп, тарих пен өнерге қосқан үлесі үшін Қ. И. Сәтпаев атындағы төсбелгі иеленіп отыр.



Еске сала кетейік, Шөптібай БАЙДІЛДИН : « Оюмен ой айтқан елміз», «Қазақтың ою-өрнектері», «Ою ой, өрнек сал», «Кейкі батыр» кітаптарының авторы. Өмір тарихын зерттеп - зерделеп, кейінгі ұрпаққа мұра етуде ерен еңбегімен танылған Шөптібай БАЙДІЛДИН ағамыз Қ.Р. Мәдениет және спорт министрінің «Үздік өлкетанушы» төсбелгісін де иемденген еді. Одан бөлек, «Арқалық қаласының құрметті азаматы», «Шыңғысхан академиясының академигі», «Қазына» сыйлығының лауреаты. Ағамызға ел үшін жасап жатқан еңбегіңіз әркез осылай еленіп, өмір - жасыңыз ұзақ болсын дейміз.